

## DI DOS SABAT

### **Un Profeta pa e Pueblo di Dios di Tempu di Fin**

*Loke Ellen White a Bisa Tokante su Ròl komo e Mensahero di Señor*

Pa Ellen White

Riba e anochi di 30 di aprel 1871 mi a retirá pa sosegá, hopi deprimí den spiritu. Pa tres luna mi tabata den un estado di gran desánimo. Mi a hasi orashon frekuentemente den angustia di spiritu pa alivio. Mi a implorá yudansa i fortaleza di Dios, ku mi por a lanta riba e desánimonan pisá ku tabata paralisando mi fe i speransa, i hasi mi inkapas pa utilidat.

E anochi ei mi tabatin un soño ku a hasi un impreshon masha felis riba mi mente. Mi a soña ku mi tabata asistiendo na un reunion importante, na kua un grupo grandi tabata kongregá. Hopi tabata di bùig dilanti di Dios den orashon ferviente, i nan tabata parse di ta kargá. Nan tabata roga na Señor pa lus spesial. Algun tabata parse di ta den agonia di spiritu; nan sintimentunan tabata intenso; ku lágrimanan nan tabata grita duru pa yudansa i lus. Nos rumannan di mas prominente tabata enbolbí den e esena di mas impreshonante akí. Bròder A tabata drumí plat abou ku su kara na suela, aparentemente den angustia profundo. Su esposa tabata sinta entre un grupo di hasidónan di chèrchi indiferente. E tabata wak manera kos ku e tabata deseá pa tur hende komprondé ku e tabata hasi bofon di esnan ku tabata humiá nan mes di e forma ei.

Mi a soña ku e Spiritu di Señor a bin riba mi, i mi a lanta meimei di gritu- i orashonnan, i a bisa: “E Spiritu di Señor Dios ta riba mi. Mi ta sinti inkliná pa bisa boso ku boso mester kuminsá traha individualmente pa boso mes. Boso ta wak Dios i ta deseá pa E hasi e trabou pa boso kua

El a laga pa boso hasi. Si boso lo hasi e trabou pa boso mes kua boso sa ku boso mester hasi, e ora ei Dios lo yuda boso ora boso tin mester di yudansa. Boso a keda sin hasi e kosnan mes ku Dios a laga pa boso hasi. Boso a bin ta yama riba Dios pa hasi boso trabou. Si boso a sigui e lus ku El a duna boso, e ora ei E lo a laga mas lus bria riba boso; pero miéntras boso ta neglighá e konseho-, spièrtamentu- i reprendementunan ku a ser duná, kon boso por spera Dios duna boso mas lus i bendishon pa neglighá i despresiá? Dios no ta hende; E lo no ser bagatelisá.”

Mi a kue e Beibel presioso, i a rondon’é ku e vários “Testimonies for the Church”, duná pa e pueblo di Dios. “Aki,” mi a bisa, “e kasonan di kasi tur a ser poné huntu. E pikánan ku nan mester evitá a ser identifiká. E konseho ku nan ta deseá por ser hañá aki, duná pa otro kasonan situá di forma similar na nan mes.

“Dios tabata kontentu pa duna boso liña riba liña i presepito riba presepito. Pero no tin hopi di boso ku realmente sa kiko tin kontené den e Testimonionan. Boso no ta konosí ku e Skrituranan. Si boso a hasi e Palabra di Dios boso estudio, ku un deseo di alkansá e norma di Beibel i perfekshon kristian, boso lo no tabatin mester di e Testimonionan. Ta pasobra boso a neglighá di familiarisá boso mes ku e Buki inspirá di Dios, El a trata na alkansá boso pa medio di testimonionan direkto i simpel, yamando boso atenshon na e palabranan di inspirashon ku boso a neglighá di obedesé, i a urgi boso pa forma boso bida di akuerdo ku su siñansanan puru i elevá.

“Señor ta digna su mes pa spièrta boso, pa reprendé, pa konsehá, a traves d e testimonionan duná, i pa impreshoná boso mente ku e importansia di e bèrdat di Su Palabra. E Testimonionan skirbí no ta pa duna lus nobo, sino pa impreshoná di forma bibu riba e kurason e bèrdatnan di inspirashon ku ya kaba a ser revelá. Hende su deber na Dios i na su próhimo a ser spesifiká enfátikamente den e Palabra di Dios; sinembargo, solamente poko di boso ta obediente

na e lus duná. Bèrdat adishonal no ta ser divulgá; pero Dios, pa medio di e Testimonianan, a simplifiká e gran bèrdatnan ku ya a ser duná, i den Su propio forma skohí a trese nan dilanti di hende, pa spièrta i impreshoná e mente ku nan, ku tur por ser lagá sin èksküs.

“Orguyo, arogansia, egoismo, odio, envidia, i yalursheit a nubla e podernan perseptivo, i e bèrdat, kua lo a hasi boso sabí pa ku salbashon, a pèrdè su poder pa enkantá i kontrolá e mente. E prinsipionan mes di santidat no ta ser komprondé, pasobra no tin un hamber i set pa konosementu di Beibel, pureza di kurason, i santidat di bida. E Testimonianan no ta pa minimisá e Palabra di Dios, sino pa eksalt’é i atraé mentenan na dje, pa e simplisidat di bèrdat por impreshoná tur hende.”

Mi a bisa mas aleu: “Meskos ku e Palabra di Dios ta rondoná ku e buki- i pamfletanan akí, asina Dios a rondoná boso ku reprimimentu, konseho, spièrtamentu, i enkurashamentu. Aki boso ta lamentá dilanti di Dios, den e angustia di boso alma, pa mas lus. Mi ta outorisá di Dios pa bisa boso ku ningun otro rayo di lus a traves di e Testimonianan lo bria riba boso kaminda, te ora boso hasi un uso práktiko di e lus ku ya a ser duná. Señor a rondoná boso ku lus; pero boso no a apresí e lus; boso a trapa riba dje. Mientras algun a despresí e lus, otronan a neglish’é, òf a siguié pero sin interes. Algun a pone nan kurason pa obedesé e lus ku Dios tabata kontentu di duna nan.

“Algun ku a risibí spièrtamentunan spesial a traves di testimonio a lubidá den un par di siman e reprimimentu duná. E testimonianan pa algun a ser ripití vários biaha; pero nan no a haña nan di suficiente importansia pa pone atenshon kuidadosamente na nan. Nan tabata pa nan manera nònsens total. Si nan a konsiderá e lus duná, nan lo a evitá pèrdida- i pruebanan ku nan ta pensa ta duru i severo.

“Nan tin solamente nan mes pa sensurá. Nan a pone riba nan propio garganta un yugo ku nan ta haña doloroso pa ser kargá. No ta e yugo ku Kristu a pone riba nan. Dios Su kuido i amor a ser ehersé na nan favor; pero nan almanan egoista, malu, inkrédulo no por a diserní Su bondat i misericòrdia. Nan ta pura bai dilanti den nan propio sabiduria, te ora, aplastá ku pruebanan i konfundí ku difikultat, nan ser kohé den trampa dor di Satanas. Ora bo akumulá e rayonan di lus ku Dios a duna den pasado, e ora ei E lo duna un oumento di lus.”

Mi a referí nan na Israel antiguo. Dios a duna nan Su lei; ma nan lo no a obedes’é. Despues El a duna nan seremonia- i ordenansanan, pa den ehekushon di esakinan Dios lo por a ser tené den memoria. Nan tabata asina lihé pa lubid’E i Su reklamonan riba nan, ku tabata nesesario pa mantené nan mente lantá pa realisá nan obligashonnan pa obedesé i honra nan Kreador. Si nan tabata obediente, i a stima pa warda e mandamentunan di Dios, e multitud di seremonia- i ordenansanan lo no a ser rekerí.

Si e pueblo ku awor ta profesá di ta e tesoro pekuiliar di Dios lo a obedesé Su rekerimentunan, manera spesifiká den Su palabra, testimonionan spesial lo no a ser duná pa spièrta nan pa nan deber, i impreshoná riba nan nan pekaminosidat i nan gran peliger di neglishá di obedesé e Palabra di Dios. Konsenshinan a ser debilitá, pasobra lus a ser poné un banda, neglishá, i despresiá. I Dios lo kita e Testimonionan akí for di e hendenan, i lo priva nan di fortaleza, i humiá nan.

Mi a soña ku, miéntras mi tabata papiando, e poder di Dios a kai riba mi den un forma di mas remarkabel, i mi a ser privá di tur forsa, sinembargo mi no tabatin vishon. Mi a pensa ku mi esposo a lanta para dilanti di e hendenan, i a sklama: “Esaki ta e poder maravioso di Dios. El a

hasi e Testimonianan un medio poderoso di alkansá almanan, i E lo obra ainda mas poderosamente a traves di nan ku El a hasi te ku awor. Ken lo ta na banda di Señor?”

Mi a soña ku basta un kantidat direpente a bula lanta riba nan pia, i a respondé riba e yamada. Otronan tabata sinta indigná, algun tabata manifestá bofon i despresio, i un par tabata parse totalmente sin preokupashon. Unu tabata para na mi banda, i a bisa:

“Dios a lanta abo, i a duna bo palabranan pa papia na e pueblo i pa alkansá kurasonnan, manera E no a duna ningun otro. El a forma bo testimonianan pa supli kasonan ku ta den nesesidat di yudansa. Bo no mester ser mové pa chèrchi, despresio, reproche, i sensura. Pa bo ta e instrumènt spesial di Dios, bo no mester stèns riba niun hende, ma dependé riba E so, i, meskos ku e rama di wendrùif ku ta tene duru, laga bo rankanan lora rondó di djE. E lo hasi bo un medio pa medio di kua bo ta komuniká Su lus na e pueblo. Bo mester reuní forsa diariamente for di Dios, pa asina ser fortalecé, pa bo besindario no bira dòf òf eklipsá e lus ku El a permití bria riba Su pueblo a traves di bo. Ta e ophetivo spesial di Satanas pa prevení e lus akí di bin na e pueblo di Dios, ku tin mester di dje asina tantu meimei di e difikultatnan di e último dianan akí.

“Bo éksito ta den bo simplesa. Asina ku bo kita for di esaki, i forma bo testimonio pa komplasé mente di kualke hende, bo poder ta bai. Kasi tur kos den e siglo aki ta lombrante i ireal. E mundu ta abundá den testimonianan duná pa agradá i komplasé pa e momentu, i pa eksaltá e ami. Bo testimonio ta di un karakter diferente. E mester yega na e detayenan di bida, manteniendo e fe débil for di muri, i ripití na kreyentenan e nesesidat di bria manera lusnan den e mundu.”—*Life Sketches*, p. 197-202.

## **SUGERENSANAN PA ORASHON**

1. Pidi Dios pa mantené bo den e simpleza di bo promé fe puru den djE.
2. Hasi orashon pa risibí lus enkuanto di e distraishonnan ku bo por a permití den bo bida ku ta kita bo di tin komunion ku Dios.
3. Halsu bo miembronan di famia i bo iglesia i pidi pa liberashon i protekshon pa nan i pa bo mes.